



**Ilaqutariit nukittorsarumallugit ilaqutariinnik siunnersuisartut (coaching) pillugu apequteqaat
allaavigalugu oqallinnissamik siunnersuut**
(Inatsisartuni ilaasortaq Nivi Olsen, Demokraatit)

Demokraatini Inatsisartunut ilaasortaq Nivi Olsen qutsavigaarput naleqquttumik soqutinartumillu apequteqaat aallaavigalugu oqallinnissamut siunnersuuteqarmat.

Pinaveersaartitsineq. Tassani qitiusariaqarpoq pinaveersaartitsineq uani ilaqutariit inuunerat pillugu oqallinnermi.

Nalunngilarput ullutsinni avittartut amerlasuupilussuusut. Avittarneq imatut paasillugu inooqatigiit - katissimasut katissimangitsullu - misiginikuaat misigiumaarlugulu - ilaqutariit avissaartariaqalerumaartut, aappaariit inooqatigiittut avissaartariaqalerpata. Tamatumap akuusut tamaasa sakkortuumik eqqortarpai, sualummiq meeqqat, ilaqutariit meerartaqarsimatillugit.

Tamatuma kinguneranik meeqqat sakkortuumik sunnerneqartarput aappaariit piumappata piumangikkaluarpataluunniit. Meeqqat sakkortunermik eqqorneqartarput susinnaannginnamik - aamma sunniuteqarpiarsinnaannginnamik - ilaqutariit avissaarneranni imminnut sunniutaasut pillugit.

Taamaattumik inuiaqatigiittut ilaqutariit inuulluarnissaannut pitsaasunik sinaakkuteqartariaqarpugut.

Sinaakkutit tassaasinnaapput, init, paarsioqarnissaq, atuarfiit, ilinniarfiit, peqqinnissaqarfik pitsaasoq aamma sulisinnaanissaq sunngiffimmi sammisaqarluarsinnaanermut periarfissat saniatigut.

Peqataanik inuiaqatigiit pinaveersaartittariaqarpaat ulluinnarni isumagisassat artornarsivallaannginnissaat allaat ilaqutariit avissaartariaqalernerannik kinguneqarsinnaasut.

Illumoorporli siunnersuuteqartoq oqarmat ilaqutariit tassaammata inuunermi ataatsimoorfiit pingaarnersaat qaninneraallu. Ilaquttat nukittorsaatigisarpagut, artornartunik pisoqaraangat. Ilaquttat taakkuupput asanninnermik aallerfigisartakkagut, tapersersuisartugut aamma isumassuisartugut ulluni nalignarni. Aamma ilaqutariit taakkuupput meeqqanik isumassuineranut ilinniartitsisussat taamatullu imminut allanullu akisussaaffiginissamut aamma ilinniartitsisussat. Inuit ataasiakkaat ilaqutariit tunniussinnaasaannik nukittuunngortinneqartarput.

Taamaattumik ilaqutariit nukittuujusariaqarput aamma ikorfartuisinnaasariaqarput artornartunik pisoqartillugu inuunerup ilaani sukulluunniit pisinnaasartunut. Taamaattumik periarfissaqartariaqarpoq Kalaallit Nunaanni ilaqutariit siunnersorneqarsinnaanissaat iltisnersorneqarsinnaanissaallu, ingerlaqqinnissaminut ikiortariaqartutut misigisimalissappata.



Naalakkersuisut akissutiminni oqarput, Inunnik Isumaginninnermut Aqutsisoqarfimmi ilaqutariit siunnersoreneqarnissaannut periarfissaqartoq. Aamma allat assigiinngitsunik suliallit isumalluutigineqarsinnaasut taaneqarput. Suliniutilli ilaqutariinnut ulorinartorsiortunut saaffiginnittuupput imaluunniit qulequttanut aalajangersimasunut soorlu kanngutsaattuliorfineqarsinnaanerup pitsaaliornissaa, persuttaaneq aamma atornerluineq.

Tassa imaappoq pinaveersaartitsinerit immaqa qulequttanut nerumippallaanut sammitinneqarsinnaapput. Taamaattumik Kalaallit Nunaanni ulluni naliginnarni ajornartorsiutaasinnaasut soorlu aappariinnerliornerit pisortat pinaveersaartitsineranni tunulluineqarpallaarsinnaallutik.

Apeqquteqaat aallaavigalugu oqallinnissamut siunnersuutip qulequtaa soqutiginarporujussuuvoq, aappariittut inooqatigiinnermi suliasat ima artornartigilersinnaasarmata naggataatigut inuiaqatigiinnut sunniuteqarsinnaasarlutik, ilaqutariit avissaartariaqalersarmata.

Taamaattumik ilaqutariit siunnersoreneqarsinnaanissaat periarfissaasariaqarpoq ulluni naliginnarni nanertuutit allivallaartinnagit allaat avissaarnissaq aalajangiunneqarsinnaallutni.

Taamatut siunnersuineq immaqa najukkami ilaqutariinnut siunnersuinertut ingerlanneqarsinnaapput, soorlu siunnersuuteqartup siunnersuutaatut. Aamma imaasinnaavoq siunnersuineq ilaqutariinnut sullissivinni ingerlanneqarsinnaasoq, oqarasuaatikkut imaluunniit qarasaasiakkut. Ateq taaqqaanngikkaluarlugu imaluunniit nammineq kissaateqarneq naapertorlugu najuulluni.

Taamatut oqaaseqarluta Demokraatini oqallinnissaq tusarusooqarput qutsavigeqqissallugulu Inatsisartunut ilaasortaq Nivi Olsen manna oqallinnissaq siunnersuutigimmagu.